


ԳԵՐ. Տ. ՇԱՀԱՆ ԵՊԻՍԿ. ՍՎԱԾՅԱՆ



Նորապսակ Տ. Շահան եպս. Սվաճյանը, ավագանի անունով՝ Սիմոն, ծնվել է Կ. Պոլսի Սկյուտար թաղում՝ 1926 թվականի սեպտեմբերի 15-ին, բարեպաշտ ու հավատացյալ ընտանիքի ծոցում։ Հայրը՝ Թորոս, թոմարզացի, մայրը՝ Մարիա, խարբերդցի։

Նախնական ու միջնակարգ կրթությունը ստացել է Կ. Պոլսի հայոց ներսիսյան և Ճեմարան վարժարաններում։ 1949 թվականին ընդունվել է Երուսաղեմի հայոց սրբոց Հակոբյանց վանքի ժառանգավորաց վարժա-

րանը, որի ընթացքը հաջողությամբ ավարտելով 1951 թվականի ապրիլին սարկավագ է ձեռնադրվել։ Այնուհետև իր ուսումը շարունակելով Ընծայարանում, այն փայլուն հաջողությամբ ավարտում է։ 1954 թվականի օգոստոսին կուսակրոն քահանա է ձեռնադրվում պատրիարքական տեղապահ դեր. Տ. Նդիշե արքեպ. Տերտերյանից։

Այնուհետև խոստումնալից և երիտասարդ հոգեորականի առաջ բացվում է վանքում և Ստամբուլում վանական-վարչական, քարոզչական-կրթական գործունեության լայն ասպարեզ։

Մինչև 1957 թվականը Երուսաղեմում, Ժառանգավորաց և ա. Թարգմանչաց վարժարաններում վարում է ուսուցչական, Նաֆա, Հայֆա քաղաքներում՝ հովվական և քարոզչական պաշտոններ։

1957 թվականի մարտին, Կ. Պոլսի հայոց ամեն. Տ. Գարեգին սրբազան պատրիարքի հրավերով ստանձնում է Սկյուտարի Ս. Խաչ դպրեմանքի փոխ-տեսչի և ապա 1959 թվականին՝ տեսչի պաշտոնն, պաշտոն, որը բեղուն արդյունավորությամբ շարունակում է մինչև 1963 թվականը։

1957 թվականին Սկյուտարի Ս. Խաչ եկեղեցում ստանում է մասնավոր վարդապետական գավազանի իշխանություն՝ Տ. Գարեգին պատրիարքից, իսկ 1961 թվականին Նաֆայի հայոց Ս. Նիկողոս եկեղեցում՝ ծայրագույն վարդապետական իշխանություն՝ ամենապատիվ Տ. Նդիշե պատրիարքից։

1961 թվականին ընտրվել է Կ. Պոլսում կրոնական ժողովի անդամ և ապա ատենապետ։

1957—1966 տարիներին Կ. Պոլսի հայկական եկեղեցիներում վարել է քարոզչական, իսկ հայկական դպրոցներում՝ ուսուցչական պաշտոններ։

Այժմ Տ. Շահան սրբազանը Կ. Պոլսում, բարոզչական իր աշխատանքների հետ, Գատրգյուղի հայոց Արամյան, Ֆերիգյուղի հայոց Միրամեթիյան վարժարաններում դասավանդում է կրոն, հայ եկեղեցու պատմություն և բարոյագիտություն:

1966 թվականի հունիսին Կ. Պոլսում սրբազան պատրիարք հոր նախագահության ներքո գումարված կրոնական ժողովը Տ. Շահան ծ. վարդապետին տվել է եպիսկոպոսության վկայություն:

1966 թվականի նոյեմբերի 13-ին, կիրակի օր, Ամենայն Հայոց Վեհափառ Հայրապետը Մ. Տաճարում եպիսկոպոս ձեռնադրեց և օ-

ծեց Տ. Շահան ծ. վրդ. Սվաճյանին:

Գերաշնորհ Տ. Շահան եպիսկոպոսը հավատավոր, պատրաստված, իր կոչման և հոգևոր պարտականություններին նվիրված հոգևորական է, սիրված ու գնահատված Կ. Պոլսի սրբազան պատրիարք հոր կողմից և իր հավատացյալ ժողովրդից:

Սրբազանը գտնվում է իր հոգևոր և իմացական ուժերի հասունության ու ծաղկման մեջ: Կ. Պոլսի պատրիարքական Աթոռը, Ստամբուլի հայ հավատացյալ համայնքներն ու ժողովուրդը նորապսակ սրբազանից սպասում են արդյունաշատ և բեղուն գործունեության:

